



SIARAN MEDIA

PROGRAM KASIHNITA PERKUKUH KEUPAYAAN DAN KESEJAHTERAAN IBU TUNGGAL SABAH

KOTA KINABALU, 16 OGOS 2026 : Menteri Pembangunan Wanita, Keluarga dan Masyarakat, YB Dato' Sri Hajah Nancy Shukri hari ini merasmikan Program Kasih Ibu Tunggal (KasihniTa) 2026 Peringkat Negeri Sabah.

Dalam ucapannya, YB Menteri berkata, program KasihniTa dibangunkan bagi mendayaupayakan ibu tunggal yang memerlukan bimbingan dan sokongan agar mereka lebih berpengetahuan, yakin serta berupaya mengurus kehidupan dengan lebih baik.

Melalui program ini, peserta diberikan pendedahan dan bimbingan dalam tiga aspek utama, iaitu literasi perundangan, pengurusan kewangan serta pembangunan psikososial yang merangkumi ketahanan diri, sokongan sosial dan potensi diri.

Berdasarkan Statistik Banci Penduduk dan Perumahan Malaysia tahun 2020 oleh Jabatan Perangkaan Malaysia (DOSM), negara merekodkan seramai 341,784 ibu tunggal di Malaysia, dengan Sabah mencatatkan sejumlah 29,232 wanita yang menjadi tunggal keluarga.

Pada tahun ini program KasihniTa di Sabah menerima sambutan yang menggalakkan dengan 684 permohonan telah diterima dari seluruh negeri dan seramai 150 peserta telah disenarai pendek untuk menyertai

program ini. Untuk rekod pelaksanaan di negeri Sabah merupakan program kemuncak Fasa 2 KashiniTa 2026.

Kejayaan program KasihnITa tidak seharusnya diukur berdasarkan jumlah peserta atau bilangan program semata tetapi dapat dilihat apabila seorang ibu tunggal lebih yakin untuk mempertahankan haknya, mampu membuat keputusan kewangan yang lebih baik, memperoleh akses kepada peluang serta membina kehidupan yang lebih sejahtera untuk diri sendiri, anak-anak dan keluarga.

Kementerian berharap agar para peserta dapat memanfaatkan pengetahuan daripada ketiga-tiga modul yang telah dikendalikan menerusi pelaksanaan program ini untuk memahami hak, mengurus kewangan dengan lebih baik serta membina kekuatan diri dan menjadikannya sebagai titik permulaan untuk melangkah ke arah kehidupan yang lebih yakin, berdikari dan sejahtera.

Turut hadir Ketua Pengarah JPW, YBrs Puan Hanani Sapit dan Pegawai-pegawai Kanan Jabatan dan Agensi Kementerian.

UNIT KOMUNIKASI KORPORAT
JABATAN PEMBANGUNAN WANITA
16 OGOS 2026